

ex ipsa natura rei indigere videntur modo superius declarato. In oeconomia igitur patriarchali, quamdiu populus nondum in civili societate, sed per familias in societate domestica consistebat, videmus familiarum patriarchas vel primogenitos, quibus exsors aliqua erat auctoritas, suo suorumque nomine sacrificia offerre; constituto autem iam populo, dum cultus publicus divinis legibus disponitur, tribus una speciali modo consecratur Deo pro universo populo, et ex hac tribu familia una seligitur, quae sola tamquam media inter Deum et populum sacrificia Deo offerat. Num. III. IV. VIII; Deuter. XVIII. Facta institutione si quando alii citra mandatum Dei in ministerium sese ingererent servatis etiam omnibus elementis sacrificiorum internis, iam non erant isti actus legitimi, publici, et solemnes cultus divinitus instituti, sed huius cultus profanationes Lev. XVII; 2. Paral. XXVI. 16. sq.; Heb. V. 1. 4.

Habemus igitur ex hucusque declaratis in divina ipsa religione praescriptos certos quosdam actus externi cultus a ceteris omnino distinctos eosque fundamentales totius cultus externi, quorum haec sunt elementa. *Materia* sunt res quaedam sensibles et substanciales; *forma* continetur actione circa eas res vel physicae destructionis vel aequivalentis immutationis. Utraque (materia et forma) coniuncta efficit, ut oblatio in actu primo apta sit, quae assumatur ad repraesentandum ipsum hominem coram Deo, et ad significandum supremum Dei dominium exprimendamque agnitionem reatus in homine lapso. Denique videmus hos ipsos actus a Deo cultus sui institutore ad hanc significacionem in actu secundo assumptos et determinatos, quae significatio se habet instar *formae metaphysicae* ad totam externam actionem et oblationem.

Ex hac analysi notionis sacrificii, sive ut in lege naturae fundatur, sive ut a Deo institutum est, consequitur haec definitio. Sacrificium est oblatio Deo facta rei sensibilis per eiusdem realem vel aequivalentem destructionem legitime instituta ad agnoscendum supremum Dei dominium simulque pro statu lapso ad profitendam divinam iustitiam hominisque reatum expiandum. «Oblatio rei sensibilis Deo facta » est genus proximum, reliqua quae adduntur, con-

stituunt differentiam specificam ab aliis oblationibus. Simil in definitione exprimitur materia, forma, significatio seu finis sacrificii, ut quisque facile videt (1).

THESES III.

De nomine sacrificii proprio et improprio seu analogico.

«Oblations hucusque descriptas esse actus divini cultus speciales nisi nomine, ex eorum inspecta natura patet; esse et proprio nomine dici sacrificia, constat tum universim ex omnium gentium consensione tum speciatim quoad veri Dei cultum in religione revelata, ex scripturis.

In primis oblations sensibiles quae Deo fiant materiam, formam, fine in superiori thesi descriptis, esse actus externi cultus distinctos toto genere non solum ab omnibus actibus internis et externis aliarum virtutum, sed etiam ab aliis actibus religiosi cultus externi, evidens est ex ipsa notione data. Sicut ergo potest dari definitio aut descriptio secundum essentialies notas, quae has omnes et solas oblations complectatur, ita potest etiam rei definitae imponi nomen, quod iis omnibus et solis *proprie* conveniat. Quamvis inde idem nomen ad alios actus sive internos sive externos, qui habeant aliquam cum his oblationibus connexionem et similitudinem, propter hanc ipsam similitudinem transferri possit; his tamen aliis actibus omnibus ratione similitudinis solum *analogice* conveniet, eo ipso quod ab oblationibus tali nomine *proprie* designatis toto genere differunt.

Iam vero constat ex usu omnium gentium, et quoad cultum religionis revelatae ex usu tum Scripturae tum fidelium quavis aetate Deum colentium, genus illud oblationis

(1) Posset in definitione primum considerari solum essentialia velut physica oblationis in se, et deinde eius significatio velut forma metaphysica, atque ita definitio data resolvi in duas, ut factum est a Suarez disp. 73. sect. 6. At nos solliciti sumus magis de expressione omnium essentialium proprietatum sacrificii in genere spectati, quam de rigore dialectico in formanda definitione.

num superiori definitione declaratum appellari proprie *sacrificia* lingua latina, et nomine aliquo respondentे in omnibus aliis linguis. Nihilominus tamen eodem usu hoc nomen ad alios actus tum internos tum externos virtutum a toto illo genere oblationum diversissimos transfertur non alio quam alicuius cum his similitudinis fundamento, et proinde significatione solum *analogica*. Ideo in Scripturis solae oblationes descriptae constanter et velut nomine suo proprio absque restrictione vel declaratione appellantur *sacrificia*, alii actus dicuntur quidem *sacrificia*, sed cum aliquo addito, quo ostendatur non absolute sed secundum quid et per similitudinem hoc nomine appellari. Ita res significata per sacrificium, scilicet actus cultus interni dicuntur sacrificium sed cum oppositione ad sacrificium proprie dictum: « si voluisses sacrificium, dedissem utique... sacrificium Deo spiritus contribulatus » Ps. L. 18. Eodem nomine sed cum aliquo addito significante impropositatem appellantur alii actus cultus externi: hostia vociferationis, hostia laudis (θυσια χτινεσεως ηδωνη) vituli labiorum, fructus labiorum Ps. XLIX. 14. 23; Hoseae XIV. 3; Hebr. XIII. 15. Aliquando non est metaphorica appellatio, sed mera comparatio cum sacrificiis proprie dictis, ut in illo Ps. CXL. 2: « dirigatur oratio mea sicut incensum in conspectu tuo; elevatio manuum mearum (sicut) sacrificium vespertinum. » Item opera misericordiae et oblationes propter Deum factae egenis dicuntur hostiae, sed cum determinatione: « talibus hostiis promeretur Deus », Heb. XIII. 16; cf. Iac. I. 27. Quandoque est tantummodo comparatio horum operum cum sacrificio e. g. « qui facit misericordiam, offert sacrificium » Ecclesi. XXXV. 4. Ulterius vita integra in gravissimis aerrumnis Deo dicata confertur cum holocausto Sap. III. 6; Rom. XII. 1; gentes ab Apostolis Deo consecratae per evangelium dicuntur sacrificium sanctificatum in Spiritu Sancto, et eodem sensu labores apostolici sunt sacrificatio Rom. XV. 16; Phil. II. 17. At quando oblationes, quas diximus esse sacrificia, cum huiusmodi actibus analogis conferuntur in propria ratione sacrificii, clarissime illae solae dicuntur sacrificia, et hi posteriores a sacrificiis distinguuntur: « misericordiam volui et non sacrificium, et scientiam Dei plus

quam holocausta » Hoseae VI. 6; « melior est obedientia quam victimae » 1. Reg. XV. 22. cf. Is. I. 11. sq.; Ierem. VII. 21. sq.

Quamvis igitur nomen sacrificii non ita unum genus divini cultus significet, ut non possit significatione translata etiam adhiberi de aliis actibus religiosis, est tamen certum, tam in cultu fundato in lege solum naturali, quam in cultu religionis revelatae modum speciale esse colendi Deum per oblationes superius descriptas, et has solas esse vere et proprie dicta sacrificia (Bellarm. I. V. c. 2; Suarez disp. 73. sect. 6.).

Corollarium 1. Licet sacrificium sit in genere signorum sacrorum, atque ita possit significatione generica appellari et a Patribus quandoque appelletur *sacramentum*, differt tamen a sacramentis specificè dictis praeter reliqua fine proximo et significatione. Sacramenti enim finis immediatus est hominum sanctificatio, sacrificii significatio et finis immediatus est cultus Dei supremæ maiestatis actu externo manifestatus (cf. de Sacram. in gen. th. I.). Per se ergo et generatim sacrificii pretium coram Deo est ex opere operantis, sicut universim cultus externus valorem habet ex cultu interno. Si cui tamen sacrificio perpetuae institutionis vel ex insita dignitate vel ex Dei ordinatione competit vis et pretium ex opere operato, hoc non pertinebit ad immediatam sanctificationem hominum; sub hac enim formaliatione indueret naturam sacramenti: sed valor ex opere operato in eo erit, ut honorem Deo debitum exhibeat, iniuriam ei factam resarciat, pro beneficiis acceptis gratias reddat, nova auxilia et beneficia impetrat (1). Potest vero esse sacrificium, quod sit fundamentum, cui innitantur, et causa meritoria, ex qua deriventur omnia alia media gra-

(1) Valor ipsius sacrificii crucis est quidem ex opere operantis Christi, personae dignitatis infinitae, simul autem in ipsa re oblata est pretium morale, de quo nunc agimus, infinitum, atque ratione dignitatis obiectivae in re oblata potest dici valor huius sacrificii ex opere operato (vid. Tract. de Incarnat.). Sed proprie spectatur valor ex opere operato in sacrificio Eucharistiae comparate ad opus operantis in sacerdote ministeriali, de qua re postea dicemus.

tiarum et sacramenta nominatim. Vide de Christo media-tore in Tract. de Incarn.

Corollarium 2. « Sacrificium visibile invisibilis sacrificii sacramentum, id est, sacrum signum est » August. de Civ. Dei l. X. c. 5. cf. c. 19. Hinc a) sacrificii externi premium et valor moralis per se petitur ex sacrificio interno, nisi dignitas specialis insit in ipsa re oblata, quod solum verificatur in sacrificio Christi. b) Si *verum* dicitur non ad distinctionem proprii a metaphorico, sed ad distinctionem rei significatae excellentioris prae signo, sicut Christus dixit se esse *vitem veram*; potest sacrificium internum appellari *verum* sacrificium in comparatione ad sacrificium externum. Ita loquitur Augustinus l. c.: « illud quod ab omnibus appellatur sacrificium, signum est *veri* sacrificii » cf. ib. c. 6. c) Si quando Deus in veteri testamento sacrificia sibi non placere significat, id intelligendum est vel in comparatione ad antitypum in novo testamento, cuius illa erant typus, et ideo desitura, cum res ipsa praefigurata advenerit; vel in comparatione ad sacrificium internum, quatenus seiuncta ab hoc sacrificio interno offerebantur; vel (ut ait l. c. Augustinus) « ita nolle dicit, quomodo ab stultis ea velle creditur velut suae gratia voluntatis. »

Corollarium 3. Cum in sacrificio ex ipsa eius natura et insita forma contineatur expressio agnitionis supremi dominii et huic respondentis absolutae dependentiae hominis ab eo, cui offertur sacrificium; patet, cur sine sacrilegio offerri non possit nisi soli vero Deo, et cur ex omnium hominum communi sensu in oblatione sacrificii contineatur professio divinitatis eius, cui offertur. « Sacrificium certe, nullus hominum est, qui audeat dicere deberi nisi Deo... quis vero sacrificandum censuit nisi ei, quem Deum aut scivit aut putavit aut finxit? » August. de Civ. Dei X. 4. Hinc sacrificia oblata fictis diis eo modo sunt et dicuntur sacrificia, quo generatim cultus divinus dicitur qui falsis diis defertur. Possunt scilicet adesse interna sacrificii elementa, sed deest obiectum dignitate sua respondens tali cultui; adeoque huiusmodi sacrificia quo excellentioris cultus sunt expressio, eo maioris sunt impietatis. « Verum

haec cum exhibentur Deo secundum eius inspirationem et doctrinam, vera religio est; cum autem daemonibus secundum eorum impiam superbiam, noxia supersticio. Quapropter qui christianas litteras utriusque testamenti sciunt, non hoc culpant in sacrilegis ritibus paganorum, quod construant templa, et instituant sacerdotia, et faciant sacrificia, sed quod haec idolis et daemoniis exhibeant » s. August. ep. 202. ad Deogratias q. 3. n. 18; de Civ. Dei l. X. c. 19. Cf. Suarez disp. 73. sect. 6; aliter Vasquez disp. 220. c. 3. n. 30. et de Lugo disp. 19. sect. 1. n. 13.

THESES IV.

De ratione typica sacrificiorum veteris testamenti.

« Praeter rationem omni sacrificio essentialiem, toti rei sacrificiae veteris testamenti ex divina dispositione inerat ratio typica respondens propriae indoli illius oeconomiae. Unde sacrificia praesertim cruenta, quatenus erant expiatoria, immediate pertinebant ad typicam – emanationem carnis – et ad significandam necessitatem expiationis theologicae, mediate vero ad praefigurandum magnum sacrificium, quo expiatio erat perficienda, et ex quo adhuc futuro – redemptio quoque erat praevericationum sub priori testamento. – »

Ratio typica sacrificiorum veteris testamenti iam velut pars in toto comprehenditur in ordine essentiali totius veteris oeconomiae et nominatim totius cultus externi. Sunt enim illic omnia praefiguratio, praeparatio et manuductio ad perfectius novum testamentum; unde a fortiori eadem ratio adumbrationis intelligitur fuisse in sacrificiis, quae tamquam pars praecipua religiosi cultus, non secus ac de sacramentis diximus, necessario respondent propriae indoli oeconomiae, ad quam pertinent (vide de Sacram. in gen. th. II.). Multis et data opera totum id, quod enuntiatur in thesi, s. Paulus docet in epist. ad Hebr. Summa autem doctrinae Apostoli ad haec revocatur.

1º. Generatim sacerdotes levitici serviunt in templo et cultu et sacrificiis, quae sunt typus et umbra coelestium futurorum in novo testamento. Horum coelestium pontifex,

sanctorum minister et tabernaculi veri, nempe antitypi praetypo veteri, Christus est. Heb. VIII. 1. 2. 5.

2°. Speciatim **vetus** illud testamentum in suo cultu externo, suis caerimoniiis, suis sacrificiis imperfectum erat, et per se sacrificia illa erant inefficacia ad expiationem peccatorum, sed solum referebantur ad expiationem legalem, « ad emundationem carnis; » hoc autem ipso exprimebant necessitatem expiationis **verae**, et portendebant sacrificium Christi cruentum, quo illa erant perficienda.

a) Ostendunt hanc relationem imperfecti ad futurum perfectum ipsa tabernaculi ac templi constructio a Deo praescripta, et ritus quo offerebantur sacrificia. Sacrificia enim offerebantur in atrio, non in interiori tabernaculo quod erat Sanctum Sanctorum; in hoc solus pontifex semel in anno ingrediebatur inferens sanguinem sacrificii, sed sanguinem inefficacem et typicum, « hoc significante Spiritu Sancto, nondum propalatam esse sanctorum viam, adhuc priori tabernaculo habente statum. Quae parabola (typus) est temporis instantis (praesentis) iuxta quam (parabolam) munera et hostiae offeruntur, quae non possunt iuxta conscientiam perfectum facere servientem. » Ita simul exprimebatur necessitas et praefigurabatur futura veritas sacrificii, quo pontifex Iesus Christus « in amplius et perfectius tabernaculum, neque per sanguinem hircorum aut vitulorum, sed per proprium sanguinem introivit semel in Sancta, aeterna redēptione inventa » Heb. IX. 1-12.

b) Eadem ratio demonstratur continua repetitione sacrificiorum, quae singula non erant applicatio expiationis iam aliquo sacrificio completae, sed in omnibus exprimebatur indigentia expiationis adhuc complenda; et ita erant simul continua praefiguratio et continua obiectiva promissio sacrificii, quo expiatio erat perficienda. « Umbram enim habens lex futurorum bonorum non ipsam imaginem rerum, per singulos annos eisdem ipsis hostiis, quas offerunt inde sinenter, numquam potest accedentes perfectos facere; alioquin cessassent offerri, ideo quod nullam haberent ultra conscientiam peccati (pro quo non iam esset praestita satisfactio), cultores semel mundati... Et omnis quidem sacerdos (leviticus) praesto est quotidie ministrans et easdem

saepe offerens hostias, quae numquam possunt auferre peccata; hic autem unam pro peccatis offerens hostiam, in sempiternum sedet in dextera Dei... Una enim oblatione consummat in sempiternum sanctificatos » Heb. X. 1-29.

c) Illa antiqua sacrificia erant ad emundationem externam et typicam, atque per hanc praefigurabant sanctificationem internam perficiendam sacrificio Christi. Ideoque sicut testamentum **vetus** cum sua hereditate temporaria, quae erat typus hereditatis aeternae propriae filiorum novi testamenti, initia batur sanguine typico sacrificiorum; unde etiam tabernaculum et omnia vasa, quae iterum praefigurabant Ecclesiam novi testamenti, consecrabant sanguine typico; ita his respondet tamquam antitypus praefiguratus initiatio novi testamenti et sanctificatio Ecclesiae per sanguinem sacrificii Christi redemptoris, ex quo sacrificio adhuc futuro non autem ex sacrificiis praefigurantibus derivabatur etiam pro veteri testamento omnis gratia ad remissionem peccatorum et ad sanctificationem theologicam. « Si enim sanguis hircorum et taurorum et cinis vitulae aspersus inquinatos sanctificat ad emundationem carnis; quanto magis sanguis Christi... emundabit conscientiam nostram... Et ideo novi testamenti mediator est, ut morte intercedente in redemptionem earum praevericationum quae erant sub priori testamento reprobationem accipiant qui vocati sunt, aeternae hereditatis. Ubi enim testamentum est, mors necesse est intercedat testatoris... Unde nec primum sine sanguine dedicatum est. Lecto enim omni mandato... omnem populum aspersit dicens: hic sanguis testamenti, quod mandavit ad vos Deus. Etiam tabernaculum et omnia vasa ministerii sanguine similiter aspersit; et omnia paene in sanguine secundum legem mundantur, et sine sanguinis effusione non fit remissio. Necesse est ergo exemplaria (**ὑπόδειγματα** typi) quidem coelestium his mundari, ipsa autem coelestia melioribus hostiis quam istis » Heb. IX. 13-23.